

खबरां

1. बिहार विधानसभा चुनावें दे पहले चरण हेठ कल 18 जिलें दे 121 चुनावी हल्कें च मतदान होगा।
2. केंद्री मंत्री किरण रिजिजू होरें वोट चोरी दा आरोप लाने आस्तै कांग्रेस नेता राहुल गांधी हुं'दी नुक्ताचीनी कीती।
3. विदेश मंत्री डॉ. एस जयशंकर होरें भारत-प्रशांत क्षेत्र दी स्थिरता च भारत-जपान दी सांझेदारी दी भूमिका पर लौऽ पाई।
4. केंद्री मंत्री डॉ. जितेंद्र सिंह होरें आखेआ जे 25 लख शा बद्द लोकें अपना डिजिटल जीवन प्रमाण पत्र बनाने लेई चेहरा पंछान प्रणाली यानि face authentication अपनाई ऐ।
5. उपराष्ट्रपति सी.पी राधा कृष्णन होर छत्तीसगढ च भारती वायु सेना दे सूर्य किरण ब्हाई कलाबाजी दल दे एयर शो च होइयां शामिल।



Bihar

बिहार च औंदे विधानसभा चुनावें दे पहले गेड तांई लोडचदियां सब्भै त्यारियां मुकम्मल करी लैतियां गेइयां ना कल संगारे 6 नवम्बर गी पहले चरण च 18 जिलें दियें 121 सीटें लेई वोट पाए जागंन। इस गेड च 1 ज्हार 314 मेदवारें दे भागें दा फैसला पंजीकृत 3 करोड 75 लख शा बद्ध मतदाता अपने मताधिकार दा इस्तेमाल करियै करगंन। दुए ते खीरी चरण दा मतदान 11 नवम्बर गी करोआया जाग। वोटें दी गिनतरी इस महीने दी 14 तरीक गी करोआई जाग। पटना, वैशाली, नालंदा, भोजपुर, मुंगेर, सारन, सिवान, गोपालगंज, मुजफ्फरपुर च कल मतदान होगा। मतदान प्रक्रिया पर तक्क रखने आस्तै सारे 45 ज्हार 341 मतदान केंद्रें पर वेब कास्टिंग कीती जाग। महिला सशक्तिकरण गी पक्का करने आस्तै 926 मतदान केंद्र ऐसे स्थापित कीते गेदे न जित्थे सारे कर्मी महिलां ना कुसै बी शिकायत गी दर्ज कराने आस्तै 0612-2824001 ते फैक्स नंबर 0612-2215611 पर ई-मेल बी करी सकदे न जेदा पता ऐ ceobihar@eci.gov.in



Rijju-Rahul

वरिष्ठ बीजेपी नेता ते केंद्री मंत्री किरण रिजिजू होरें बीजेपी ते चुनाव आयोग पर वोट चोरी दा आरोप लाने पर कांग्रेस नेता राहुल गांधी हुं'दी नुक्ताचीनी कीती ऐ। नमीं दिल्ली च अज्ज मीडिया गी जानकारी दिंदे होई रिजिजू होरें गांधी हुं'दे पर इल्जाम लाया जे जिल्लै चुनावी नतीजे उन्दे हक च नेही आंदे ते ओह चुनाव आयोग ते ई.वी.एम गी दोष देना शुरू करी दिंदे न। उनें आखेआ जे मतदाता सूचिएं च कोई कुटलकांजी बारै कांग्रेस गी चुनाव आयोग गी शिकायत करनी चाइदी। बीजेपी नेता नै गांधी हुं'दे बारै आखेआ जे ओह गैर जरूरी मुद्दें चुकदे रौहंदे न।



India-Japan

विदेशी मामलें दे मंत्री डॉ. एस जयशंकर होरें आखेआ जे भारत-प्रशांत क्षेत्र च रणनीतिक स्थिरता गी मजबूती दिंदी ऐ। 8मीं भारत-जपान भारती प्रशांत फोरम गी नमी दिल्ली च संबोधित करदे होई डॉ. जयशंकरह होरें आखेआ जे दवें देशें बश्कार रिश्ते पिछले किश बरें च मजबूत होए न ते पैहले थमां मते मूल्यवान बनी गए न। मंत्री होरें आखेआ जे 2 बड्डे प्रजातंत्र ते समुंद्री राष्ट्रें दे तौरा पर भारत-जपान दी जिम्मेदारी भारत-प्रशांत ते भारत-प्रशांत महासागर मुहिम बक्खी बदी जंदी ऐ।



Jitender-Singh

कार्मिक, लोक शकैत ते पिंशन राज्यमंत्री डॉक्टर जितेंद्र सिंह होरें अज्ज आखेआ जे 25 लक्ख शा बद्द लोकें अपना डिजिटल जीवन प्रमाणपत्र बनाने ताई चेहरा पंछान प्रणाली-फेस आथेंटिकेशन अपनाई ऐ। नमीं दिल्ली च चौथे राष्ट्रव्यापी डिजिटल जीवन प्रमाण पत्र अभियान दे उद्घाटन मौके डॉ. सिंह होरें एह गल्ल आक्खी। श्री सिंह होरें इब्बी दस्सेआ जे अभियान इस म्हीने दे खीरै तगर जारी रौह्ग। उनें इस अभियान पर इक पुस्तक ते लघु फिल्म दा विमोचन बी कीता।

<><><><><><>

AI-Governance Guidelines

इलेक्ट्रानिक्स ते सूचना तकनीकी मंत्रालय नै अज्ज भारत ए.आई प्रशासनिक दिशा-निर्देश नमीं दिल्ली च जारी कीते। एह दिशा-निर्देश सुरक्षित समावेशी ते जिम्मेदारी कन्नै ए.आई गी हर क्षेत्र च अपनाते सरबन्धी ढांचा ऐ। इनें दिशा-निर्देशें गी भारत सरकार दे प्रमुख साइंटिफिक सलाहकार प्रो. अजय कुमार सूद होरें Meit-Y दे सचिव एस. कृष्णन हुंदी मौजूदगी च जारी कीता। इस मौके बोलदे होई सूद होरें आखेआ जे निर्देश असान न। एहदे कन्नै कोई नुकसान नेई होग। उनें आखेआ जे भारत दा ए.आई मिशन इस ढांचे गी होर मजबूत करोग ते बाकी राष्ट्रें आस्तै प्रेरणा बनोग।

<><><><><><>

China-Nexperia Issue

चीन नै नीदरलैंड गी गुजारिश कीती ऐ जे ओह अंदरूनी कारपोरेट मसले च दखल-अंदाजी करना बंद करे ते सेमीकंडक्टर निर्माताएं दे मसलें दा कोई ठोस हल कडै। एह चेतावनी उस्सलै आई जिसलै सरकार नै सितंबर च फैसला लैता जे चीनी कंपनी विंगटेक टेकनालजी थमां नेक्सपीरिया दे नियंत्रण गी रोक दीत्ता जा। चीनी वाणिज्य मंत्रालय दे इक प्रवक्ता नै आखेआ जे चीन उद्यमों दे कनूनी हकें दी रक्षा जरूर करोग ते वैश्विक स्तर पर सेमीकंडक्टर आपूर्ति गी स्थाई ते सेही तरीके चलाने आस्तै हर कोशिश करोग।

<><><><><><>

Russia-Nuclear Missile

रूस दे राष्ट्रपति व्लादिमीर पुतिन होरें आखेआ ऐ जे रूस नै अगली पीढी दी न्यूक्लियर पावर आहली कूज मिसाइल बनाने दा कम्म शुरू करी दिता ऐ। क्रेमलिन च हथियार बनाने आहलें आस्तै पुरस्कार समारोह गी संबोधित करदे होई राष्ट्रपति पुतिन होरें आखेआ जे न्यूक्लियर हथियारें रूस आस्तै ते पूरी 21मीं शताब्दी आस्तै ऐतिहासिक महत्वता रखदे न। उनें आखेआ जे नेक्स जेनरेशन दी न्यूक्लियर कूज मिसाइल दी गति ध्वनि दी गति थमां त्रै गुणा मता होग ते ओह हायरसोनिक बी बनी सकदियां न। पुतिन होरें आखेआ जे मजबूत हथियार प्रणाली, रक्षा क्षेत्र दा विकास, रूसी सेना ते नौसेना गी अज्जै-कल्लै दे हथियारें कन्नै लैस करने जनेई सारी योजनाएं पर कम्म जारी ऐ।

<><><><><><>

Gurupurab

सिख धर्म दे संस्थापक गुरु नानक देव जी हुंदा 556मां प्रकाशोत्सव धार्मिक उत्साह कन्नै मनाया जा करदा ऐ। 1469 च कत्ते म्हीने दी पुण्येया आहले ध्याडे लाहौर च राय थेई दी तलवंडी, जिसी हुन ननकाना साहब आखेआ जंदा ऐ च पैदा होए दे गुरु नानक जी इक्क महान आध्यात्मिक गुरु हे। उनें लोकें गी इक ईश्वर, ईमानदार, दयालु ते मदाद करने आहला जीवन जीने दे महत्व बारै सखाने च अपना समूलचा जीवन समर्पित करी दिता। उंदियां शिक्षा इस गल्ला पर जोर दिंदियां न जे सब्बै मनुक्ख इक्क बरोबर न। जम्मू च श्री प्रकाश पर्व मनांदे होई लोक बड़ी मती गिनतरी च गुरुद्वारें च मत्था टैका'रदे न। मुख समारोह बीबी चांद कौर गुरुद्वारे च आयोजित कीता गेआ

हा। शुरुआत जित्थे अज्ज बड्डुलै नगर कीर्तन ते अखंड पाठ कन्नै होई। संगत लेई पूरे दिन लंगर दी टकोहदा बवस्था कीती गेदी ही। एहदे अलावा हिंदू धर्म दी नेकें बिरादरियें अज्ज जम्मू च अपने-अपने कुलदेवता या कुल देवी दे थानें पर सलाना मेल दा सरिस्ता कीता जित्थे लोकें टकोहदा करियै नमें बयाए दे जोड़ें देवी-देवताएं सामने मत्था टेकिये सुख-शांति दी प्रार्थना कीती। उपराज्यपाल मनोज सिन्हा ते मुख्मंत्रि उमर अब्दुल्ला होरें गुरु नानक देव जी हुंदे प्रकाश पर्व पर लोकें गी बधाई दिती ऐ। उनें लोकें गी गुरु हुंदियें शिक्षा दी पालमा करने ते अमन-रमानदारी दे अलावा आपसी भाईचारे आहले मुल्लें गी बनाई रखने दी अपील कीती।

<><><><><><>

VP-AIR Show

उपराश्ट्रपति सी.पी राधाकृष्णन होरें अज्ज नवा रायपुर, छत्तीसगढ़ च भारती वायु सेना दी मशहूर सूर्य किरण एयरोबेटिक टीम तरफा लाजवाब एयर शो दिक्खेआ। हैरतंगेज हुनर ते कलाबाजी दी पेशकश नै माहौल गी देश प्रेम दी भावना कन्नै भरोची दिता ते राज्य दे निर्माण दी 25मीं बरेगंड यानि छत्तीसगढ़ रजत महोत्सव सरबंधी कार्यक्रमें गी होर खास बनाई दिता। राज्यपाल-रामेन डेका, मुख्मंत्रि विष्णु देयो सई ते होर मन्ने-परमन्ने दे लोक इस मौके पर मौजूद हे। अदम्य साहस ते तकनीकी सक्षमता दा प्रदर्शन करदे होई सूर्य किरण, एयरोबेटिक टीम नै किश बेमिसाल पेशकश आसमान च पेश कीतियां।

<><><><><><>

Encounter

जम्मू- कश्मीर दे किश्तवाड़ जिले च अज्ज बड्डुलै आतंकवादियें ते सुरक्षा बलें बश्कार टाकरा होआ। अधिकारियें दस्सेआ जे जम्मू-कश्मीर पुलिस कन्नै रलियै व्हाइट नाइट कोर नै थ्होई दी खुफिया जानकारी दी विनाह पर इक अभियान रम्भ कीता जिस दरान उन्दा आतंकियें कन्नै टाकरा होआ। घट्टोघट्ट 3 आतंकवादियें दे टाकरे आहली थाह पर होने दी शैंका ऐ। टाकरे च इक्क जवान दे ममूली तौरा पर जखमी होने दी खबर ऐ। तोआई, पुंछ जिले दे सरहदी इलाके च शुबे आहली नक्लोहरकत दी जानकारी थ्होने परैंत सुरक्षा बलें तपाशी अभियान चलाया। दस्सेआ गेआ ऐ जे बालाकोट-मेंढर सरहदी इलाके च संदिग्ध जने दी सूचना थ्होने मगरा एह टकोहदा अभियान ए.ओ.जी, सेना ते सी.आर.पी.एफ नै सांझे तौरा पर रम्भ कीता। सुरक्षा बल हाई अलर्ट पर न ते मकामी लोकें गी अपने इलाके च शुबे आहली कुसै बी नक्लोहरकत दी जानकारी सांझी करने दी अपील कीती ऐ।

<><><><><><>

Goyal-Newzealand

उद्योग ते वाणिज्य मंत्री पीयूष गोयल होरें अज्ज अपने हमरूतबा न्यूजीलैंड दे उद्योग मंत्री Todd Mc Clay हुंदे कन्नै आकलैंड च भारत-न्यूजीलैंड बिजनेस फोरम च मिले। मलाटी दरान गोयल होरें दवें देशें बश्कार सहयोग दे क्षेत्र, रक्षा, शिक्षा, खेड्डां, सैलसफा ते एयरोस्पेस पर लौऽ पाई। गोयल होरें न्यूजीलैंड च रवा'रदे भारतीयें गी न्यूजीलैंड दे प्रधानमंत्री Christopher Luxon ते Mc clay हुंदे कन्नै संबोधित कीता। उनें आखेआ जे सरकार बपार गी सखल्ला बनाने आस्तै टैक्स दा भार घटा'रदी ऐ, लाल फीताशाही गी खत्म करा'रदी ऐ ते सरबंधत रूकावटें दा हल करा'रदी ऐ। उनें दस्सेआ जे भारत गी इक आकर्षक थाहर बनाने आस्तै कोशशां जारी ना। उनें जोडेआ जे भारत-न्यूजीलैंड बश्कार मुफ्त बपार समझौते गी अंतिम रूप देना सिर्फ दवें देशें बश्कार बपार ते निवेश गी मजबूती नेई दिंदा सगुआं मौकें दी उपलब्धता बदाई दिंदा ऐ।

<><><><><><>